

IZVJEŠTAJ O AKTIVNOSTIMA EKO FORUM-a za period april 2021 – mart 2022.g.

Redovna godišnja skupština održana je 24.4.2021 godine. Zbog pandemije korona virusa Skupština je održana kombinovano: u prostorijama Eko foruma Zenica (3 delegata) i online preko Zoom platforme (22 delegata). Na Skupštini su prezentirani i usvojeni izvještaj o radu za period mart 2020 - mart 2022, finansijski izvještaj za 2020. godinu, kao i plan rada za 2021 godinu. Izabrano je i rukovodstvo udruženja na mandatni period od 4 godine. Izborom novog rukovodstva promijenila se polna struktura, tako da na čelu udruženja sada imamo više od 50% žena (od 15 članova rukovodstva: predsjednik, potpredsjednica, predsjednica i zamjenik predsjednice skupštine, upravni odbor, nadzorni odbor, 8 su žene).

Sredstva za aktivnosti udruženja obezbijeđena su realizacijom projekata i donacijama. Udruženje je u izvještajnom periodu koristilo bez naknade prostorije u vlasništvu grada Zenice, uz plaćanje režijskih troškova. Projekti su nam omogućili da od imamo zaposlene tri osobe na određeno, na puno radno vrijeme, a plate i doprinosi za njih obezbijeđeni su u potpunosti iz budžeta projekta.

26.4.2021 uputili smo gradskoj upravi Zenica zahtjev za pristup informacijama u vezi sporazuma o prijateljskom okruženju sa privrednim društvom JP Elektroprivreda BiH.

27.4.2021 učestvovali smo na online edukaciji CPCD o finansijskom izvještavanju.

1.5.2021 počeo je s realizacijom projekat zagovaračke mreže "Zaštita prirode na teritoriji grada Zenice". Nosilac aktivnosti na njegovoj realizaciji je Eko forum, a partneri Udruženje Eko Tvrtkovac i Savez izviđača grada Zenice. Projekat se realizuje u okviru CPCD-ovog Projekta Misli o prirodi!, koji uključuje više različitih inicijativa širom Bosne i Hercegovine, koje finansira Švedska.

10.5.2021 aktivno smo učestvovali na online konsultacijama između EU i organizacija civilnog društva o pitanjima od značaja za institucionalni dijalog između EU i BiH po Sporazumu o stabilizaciji i pridruživanju (SSP) o okolišu, djelovanju u oblasti klime, transportu, energiji, planu regionalne povezanosti kao i regionalnom razvoju. Iskazali smo naša mišljenja i stavove o dešavanjima i problemima u ovim oblastima, kao i o cjelokupnim efektima pandemije Covid 19 na njih, prije predstojećeg godišnjeg sastanka Pododbora između EU i BiH. Ovom događaju bilo je 32 učesnika. Na strani EU, sastanku su prisustvovali stručnjaci iz Ureda EU u BiH i iz Evropske komisije.

10.5.2021 posjetili su nas predstavnici šumskog privrednog društva (ŠPD) iz Zavidovića. Razlog ove posjete je certificiranje šuma, odnosno uspostavljanje saradnje sa OCD u tom procesu. Na sastanak smo pozvali i predstavnike organizacije Eko Tvrtkovac jer smo smatrali da su oni upućeniji u stanje šuma na području Grada Zenice od nas.

11.5.2021 prisustvovali smo zoom sastanku u organizaciji CPCD-a o pravilima komunikacije i vidljivosti. Učestvovali smo na online konferenciji: Inicijativa regionalnog umrežavanja – u organizaciji Evropskog Fonda za Balkan iz Beograda.

18.5.2021 putem naše WEB stranice smo reagovali na "incident" koji se desio u rijeci Bosni. Radi se o izlivanju industrijskih otpadnih voda nizvodno od glavnog kolektora kompanije AMZ.

19.5.2021 Učešće na sastanku regionalne grupe za poglavlje 27. Učešće u istraživanju sa Gothenburškog univerziteta iz Švedske (online intervju: perspektive civilnog društva u zagađenju okoliša u BiH)

21.5.2021 Koordinacijski sastanak Arhus centara

24.5.2021 u prostorijama Eko foruma smo održali sastanak sa predstavnicima Gradske uprave Zenica. Tema sastanka je bila dobijanje lokacija za akciju sadnje drveća. U okviru projekta Eko HUB Zenica smo planirali realizovati akciju sadnje drveća, pa smo o tome razgovarali sa predstavnicima Gradske uprave Zenica. Na sastanku smo se okvirno dogovorili da bi akcija sadnje drveća trebala da se realizuje u mjesecu oktobru ili novembru ove godine. Do tada će nam Gradska uprava odgovoriti na kojim tačno lokacijama možemo saditi drveće.

24.5.2021 Održali smo sastanak sa predstavnicima Saveza izviđača grada Zenica i Eko Tvrkovic.

25.5.2021 naš predstavnik je učestvovao u 4. Zenica Meetup u saradnji sa organizacijom I-Platforma

27.5.2021 smo zvanično prezentirali javnosti dizajn majica i cekera Eko HUB Zenica. Učešće na Tratolow – webinar o taksama na ugljen dioksid

31.5.2021 posjetili smo kompaniju Mann+Hummel BA (dio njemačkog koncerna Mann Hummel). Na sastanku u kompaniji Mann+Hummel BA bio je prisutan direktor ove kompanije gospodin Mahmut Galijašević. Ova kompanija prvenstveno proizvodi filtere za automobilsku industriju, a ista kompanija u Njemačkoj proizvodi prečišćivače zraka: u zatvorenom prostoru, tako i Tom prilikom mi smo predstavili naš Eko HUB i projekat Misli o prirodi i dogovorili zajedničke aktivnosti u narednom periodu.

31.5.2021 Imali smo sastanak sa partnerskom organizacijom iz Tešnja "Sram te bilo" , koja je potpisala Sporazum o saradnji.

1.6.2021 Učešće (Beograd-online) na Western Balkans Summit Berlin | Civil Society & Think Tank Forum (prezentacija i panel diskusija "Panel 3: The Green Agenda: Committing to a Sustainable Europe")

2.6.2021 (online) Učešće na webinar "Tajna uspjeha Švicarske", Centar za promociju civilnog društva (CPCD) i Dijaspora za razvoj BiH (i-platform)

5.6.2021 Svjetski dan zaštite okoliša obilježili smo uličnom akcijom - Eko kviz.

6.6.2021 Sastanak s mjesnim zajednicama - organizacija protestnog skupa protiv HE Janjići (MZ Brist)

7.6.2021 Organizovali smo mirne proteste protiv izgradnje HE Janjići zato što je je Gradsko vijeće Zenica odbilo građansku inicijativu za stavljanje van snage svojih prethodnih odluka o hidroelektrani Janjići, koja je bila potkrijepljena sa 1.563 potpisa. Gradsko vijeće Zenica je raspravu o građanskoj inicijativi tek nakon 55 dana naknadno uvrstilo u dnevni red nastavka sjednice za koju javnost nije znala da će biti održana. Predsjedavajući Gradskog vijeća Zenica nam nije dozvolio da prisustvujemo sjednici GV te nismo imali priliku da vijećnicima na sjednici iznesemo sve argumente i dokaze da hidroelektrana Janjići ne predstavlja javni interes.

7.6.2021 Učešće na sastanku Komisije za prostorno uređenje, stambeno-komunalnu politiku, infrastrukturu i zaštitu okoline ZDK

8.6.2021 (online) Učešće na Virtual Workshop on Air Pollution and Health in Southeast Europe

9.6.2021 objavljen je poziv za angažman saradnika za izradu stručnih podloga za studiju izvodljivosti proglašenja jednog ili više zaštićenih područja na teritoriji grada Zenice, u okviru Projekta „Zaštita prirode na teritoriji grada Zenice“.

10.6.2021 (online) Učešće na Javnoj raspravi o Analizi normativnog okvira o finansiranju organizacija civilnog društva u FBiH (CPCD)

17.6.2021 Presentacija Alternativnog registra zagađivača www.eko.ba (Arnika)

25.6.2021 u našim prostorijama održali smo sastanak sa predstavnikom Eko HUB Maglaj. Tema sastanka je zajednička inicijativa prema Ministarstvu za prostorno uređenje, promet i komunikacije i zaštitu okoline ZDK o promjeni kriterija prilikom dodjele sredstava u javnim pozivima za projekte iz oblasti ekologije za udruženja, nevladine organizacije. Na sastanku se također razgovaralo o zajedničkom obraćanju ovom Ministarstvu i po pitanju inicijative o proglašenju zaštićenih područja jer ova dva Eko HUB- a reliziraju projekte o zaštićenim područjima. Isti dan, održali smo sastanak i sa predstavnicima Gradske uprave Zenica.

5.7.2021 (online) Učešće na CivilSociety & Think TankForum II

14.7.2021 (Online) Učešće na Green Agenda for the Western Balkans - NGO Forum

21.7.2021 Sastanak s Centrom za životnu sredinu Banja Luka (aktivnosti nakon projekta o monitoringu KEAP)

30.7.2021 Snimanje medijskog priloga o "pušari" (FTV). U rješavanje ovog problema smo uključeni već neko vrijeme. Radi se o podzemnom požaru u napuštenom rudniku uglja koji je smješten u užem centru grada. Nama su se obraćali građani naselja Blatuša koji su najviše pogođeni ovim problemom. Mi smo pisali na razne adrese, međutim, zbog prebacivanje odgovornosti u institucijama vlasti ovaj problem nije riješen.

3-5.8.2021 Udruženje KAM, u saradnji sa Eko Forumom Zenica i uz podršku Misije OSCE u BiH, idejni je tvorac projekta "Građani revizori". Cilj projekta je informirati i povezati mlade aktiviste sa područja grada Zenica da djeluju proaktivno i zagovaraju za rješavanje okolišnih problema. U okviru projekta održano je šest radionica, po dvije radionice na tri lokacije – Centar za mlade Zenica, te mjesne zajednice Babino i Nemila. Putem radionica učesnici su imali priliku da se upoznaju sa misijom i aktivnostima koje provodi Arhus Centar Zenica, nadležnostima lokalnih i kantonalnih vlasti u vezi zaštite okoliša, te porazgovaraju o okolišnim problemima iz perspektive mladih.

9.8.2021 Sastanak s predstavnicima MZ Tetovo, Gradišće, Brist - najava protesta

10.8.2021 Sastanak kod gradonačelnika Zenice u vezi zagađenja iz AMZ

11.8.2021 Prezentacija Klimatske promjene i zaštićena područja za izviđače na Boračkom jezeru

13.8.2021 Koordinacijski sastanak za akciju čišćenja

16.8.2021 Medijska kampanja o zagađenju za "Content Authenticity Initiative" s fotografom Zijahom Gafićem

19.8.2021 Koordinacijski sastanak za akciju čišćenja

21.8.2021 Akcija čišćenja „Očistimo grad za jedan dan“ je ekološke akcije koja je organizovana od strane neformalne grupe Rijeke Bosne i Hercegovine „Budi promjena“ i u kojoj smo i mi učestvovali. Na ovoj akciji učestvovalo je oko 800 učesnika i prikupljeno 30 tona otpada.

23-24.8.2021 Nakon sastanaka na kojima su građani identifikovali ekološke probleme s kojima su suočeni u lokalnim zajednicama, održane su radionice na terenu.

26.8.2021 U Sarajevu je održana dvodnevna konferencija projekta Misli o prirodi! Partneri na projektu "Zaštita prirode na teritoriji grada Zenice", Eko forum Zenica, Eko Tvrtkovac i Savez izviđača grada Zenica na tri panel diskusije predstavili su do sada postignute rezultate u ovom projektu, ali i teškoće na koje su naišli u realizaciji projekta. Prepreke nisu došle od institucija vlasti, nego od navodnih ljubitelja prirode, sa čime smo upoznali sve učesnike konferencije. Bez

obzira na teškoće, projektni partneri su odlučni da se postigne osnovni cilj projekta: najmanje 10% teritorije grada Zenice zaštićeno u skladu sa Zakonom o zaštiti prirode FBiH.

30.8.2021 Sastanak s Vesnom Bojičić iz London School of Economics u vezi projekta "Inclusive dialogue with business" i izvještaja "Human Security Business Partnership (HSBP) Framework" UN Trust Fund for Human Security u kojem se opisuje rad Eko foruma

2.9.2021 Član Eko Hub-a je održao trening za osoblje misije OSCE-a u BiH na temu: "Uloga civilnog društva u primjeni Arhuške konvencije

6.9.2021 povodom svjetskog dana čistog zraka koji se obilježava 7. septembra, posjetili smo Ministarstvo obrazovanja, nauke, kulture i sporta ZDK. Tom prilikom smo razgovarali sa ministrom Spahijom Kozličem o kvalitetu zraka u učionicama. Dogovorili smo organizovanje okruglog stola o kvalitetu unutrašnjeg zraka u obrazovnim ustanovama u ZDK, koji bi trebao ponuditi rješenja za smanjenje ili eliminisanje ovog problema koji ima negativne posljedice po zdravlje djece. Ministarstvo već sprovodi ili planira aktivnosti koje bi mogle doprinijeti poboljšanju kvaliteta zraka. Za nekoliko škola obezbjeđena su sredstva za zamjenu peći na ugalj pećima na pelet, u toku je projekat utopljanja školskih objekata i provođenja mjera energetske efikasnosti, u saradnji s donatorima izvršena je nabavka toplotnih pumpi u odabranim školama i solarnih panela na đlačkom domu u Zenici, a za jesen je planirana akcija sadnje drveća u dvorištima škola u ZDK koju će provesti učenici i nastavnici kao dio vannastavnih aktivnosti.

8.9.2021 održan je sastanak koordinacionog odbora mreže Eko-BiH na kojem je učestvovao i Eko forum Zenica. Na sastanku je raspravljano o dokumentima koji su nastali u okviru projekta: Strateški plan mreže Eko BiH i nacrt radne verzije Strategije prikupljanja sredstava za rad Eko-BiH mreže. Eko-BiH je neformalna grupa organizacija civilnog društva (OCD), pojedinaca i lokalnih zajednica koje djeluju u oblasti životne sredine u BiH.

9.9.2021 prisustvo na regionalnom sastanku koalicije 27 (OCD sa Zapadnog Balkana koje prate napredak u Evropskim integracijama po pitanju zaštite okoliša)

14.9.2021 U prostorijama Instituta "Kemal Kapetanović" održan je sastanak Zeničke grupe za ekološki dijalog, koja je nastala kao rezultat projekta "Inkluzivni dijalog sa biznisom". Sastanku nisu prisustvovali predstavnici kompanije Arcelor Mittal Zenica niti grada Zenice, a tema sastanka bila je obnova okolinskih dozvola za pogone i postrojenja Arcelor Mittal Zenica. Na sastanku, na kojem su učestvovali i imenovani stručnjaci za ocjenu Zahtjeva za obnovu okolinske dozvole, zatraženo je od Federalnog ministarstva okoliša i turizma da kompanija Arcelor Mittal dopuni zahtjev podnesen u februaru 2021 s nedostajućom dokumentacijom i podacima

16-17.9.2021 u Beogradu smo učestvovali na konferenciji "Engaged Democracy Initiative Convention". Eko forum je na poziv organizacije "European Fund for the Balkans" i uz podršku

fondacije "Friedrich-Ebert-Stiftung" aktivno učestvovao u radu konferencije. Inicijativa angažirane demokratije (EDI), koju su pokrenuli Evropski fond za Balkan (EFB) i Institut za demokratsko angažovanje jugoistočne Evrope (IDESE), imala je za cilj okupiti lokalne organizacije, istraživače, društvena preduzeća i aktivne građane na Zapadnom Balkanu koji su uključeni u pitanja demokratizacije, društvene nepravde i odgovornosti institucija, te ih podržati da udruže snage i rade na očuvanju i promicanju vrijednosti otvorenih, solidarnih i demokratskih društava. Podizanjem svijesti o glavnim problemima, razmjenom iskustava i dobre i efikasne prakse, Konvencija o angažiranoj demokratiji pod sloganom "Uključi se, nadahni, osnaži!" omogućit će formiranje nove, nehijerarhijske mreže pojedinaca i organizacija koje rade zajedno na regionalnom nivou.

18-19.9.2021 smo na Martinskom visu bili učesnici dvodnevne Konferencije za zaštitu prirode i biodiverziteta u Zeničko-dobojskom kantonu, održane u organizaciji Udruženja građana Fojničani Maglaj (Eko HUB Maglaj), uz podršku Centra za promociju civilnog društva, učestvovali su, pored domaćina, članovi Planinarskog društva Vis Žepče, Sportskog i naučno-istraživačkog kluba Atom iz Zavidovića, Eko foruma Zenica, Udruženja Eko Tvrtkovac Zenica, Planinarsko-smučarskog društva Perun iz Vareša, Udruženja Eko Turist Vareš, uz predstavnike Fonda za zaštitu okoliša FBiH, Javne ustanove za zaštitu prirode Kantona Sarajevo i WWF Adria. Dogovoreno je i potpisivanje Memoranduma o razumijevanju, na osnovu kojeg će biti formalizovan rad Koordinacije organizacija, povezanih zajedničkim aktivnostima na zaštiti prirode.

21.9.2021 u prostorijama udruženja "Naša djeca" održana je završna radionica u okviru projekta "Građani revizori" udruženja KAM. Jedan od predavača na ovoj radionici je bio i član Eko foruma. Radionici su prisustvovali mladi iz Saveza izviđača grada Zenice i udruženja "Naša djeca". U vrlo živoj i kreativnoj diskusiji, mladi su razgovarali o aktuelnim problemima i rješenjima za zaštitu okoliša u Zenici. Ovaj projekat su podržali OSCE misija u BiH i grad Zenica.

22.09.2021 povodom Svetskog dana bez automobila data je izjava za TV Zenicu

23-24.9.2021 putem Zoom platforme smo učestvovali na godišnjem sastanku Arhus centara. Arhus centar Zenica (Eko forum) učestvovao je u radu sastanka s prezentacijom rezultata projekta "Inkluzivni dijalog s biznisom", koji je realizovan tokom prethodne dvije godine.

24.9.2021 u prostorijama Ambasade Sjedinjenih Američkih Država u Sarajevu održan je sastanak predstavnika 12 ekoloških organizacija sa nj.e. ambasadorom Ericom Nelsonom i osobljem ambasade. Cilj sastanka bila je diskusija o zaštiti okoliša, vladavini prava i zaštiti prirodnog naslijeđa u BiH, te o načinima na koji SAD može pomoći u rješavanju tih pitanja.

28.9.2021 u našim prostorijama smo organizovali radionica za medije pod nazivom "Kako biti okolišni novinar?" Moderator radionice bila je Sanela Habeš, novinarka BH radija 1 i dobitnica niza međunarodnih priznanja za okolišno novinarstvo. Na radionici su novinari lokalnih medija

razmijenili svoja iskustva u izvještavanju o temama zaštite okoliša, te o izazovima i problemima s kojima su se suočavali u svom radu. Pored entuzijazma novinara, dobre pripreme za izradu medijskih izvještaja, ukazano je i na potrebu da se urednicima i vlasnicima medija pokaže koliko su značajne ove teme i zašto im treba posvetiti više pažnje.

29.9.2021 aktivisti i pravni eksperti iz austrijske organizacije RiverWatch, zajedno s aktivistima regionalnog saveza "Odbranimo r(ij)eku Balkana", češke organizacije CEE Bankwatch Network, Eko HUB-a Sarajevo i Koalicije za zaštitu rijeka u BiH, posjetili su lokaciju na kojoj JP Elektroprivreda namjerava graditi hidroelektranu Janjići. Smatramo da je ova posjeta jako bitna radi nastavka naše borbe da se ne izgradi HE Janjići na rijeci Bosni i nakon odbijanja gradskog vijeća Zenica naše građanske inicijative. Učešće na oline NGO forumu Zelena agenda za Zapadni Balkan u organizaciji RCC-a

30.9.2021 posjetila nas je ekipa FACE TV da bi snimila emisiju FACE PLUS

1.10.2021 učešće na online konferenciji: "Global and regional evidence on health effects of air pollution: case of SE Europe"

12.10.2021 članica Eko HUB je prisustvovala regionalnom sastanku koalicije 27 (OCD sa Zapadnog Balkana koje prate napredak u Evropskim integracijama po pitanju zaštite okoliša)

13.10.2021 Balkanska istraživačka mreža snimila prilog o zagađenju i stranim investitorima

16.10.2021 Snimanje priloga o aktivizmu, Radio Aktiv (Naša djeca)

16.10.2021 Eko forum je u okviru Projekta Zaštita prirode na teritoriji grada Zenica, u petak bio domaćin sastanka organizacija civilnog društva sa predstavnicima ŠPD ZDK, koje upravlja Parkom prirode Tajan, čime je otvoren dijalog sa institucijama nadležnim za brigu o područjima prirode u Zeničko-dobojskom kantonu. Ovo je nastavak saradnje udruženja uključenih u implementaciju projekata zaštite prirode s područja ZDK, koja je počela stvaranjem neformalne Koalicije za zaštitu prirode, u septembru na Matinskom visu.

22.10.2021 Snimanje priloga za Italijansku televiziju

23.10.2021 Član Eko HUB-a je bio jedan od panelista na NDI konferenciji "Okolišne politike za 21. stoljeće: Izazovi, perspektive i rješenja" u Sarajevu

22-24.10.2021 Učešće na sastanku EKO BiH mreže na Tjentištu

26.10.2021 Snimanje video priloga za radio Active Zenica

27.10.2021 prezentacija na Eko pravnoj klinici na Palama u organizaciji Arhus centra Sarajevo/Eko HUB-a Sarajevo

28.10.2021 prezentacija na Eko pravnoj klinici u Mostaru u organizaciji Arhus centra Sarajevo/Eko HUB-a Sarajevo

5.11.2021 smo prisustvovali Zoom sastanku sa CPCD-om i ostalim Eko HUB-ovima sastanak u vezi organizovanja aktivnosti Eko putujuća slika

5.11.2021 online koordinacijski sastanci za akciju sadnje drveća – regionalna akcija "Drvo prijateljstva", onlie sastanak – priprema javne tribine za Janjiće (Arhus centar Sarajevo i MZ Janjići)

11.11.2021 u hotelu Zenica smo organizovali okrugli sto o kvalitetu zraka u učionicama. Na okruglom stolu učestvovali su predstavnici Ministarstva za obrazovanje, nauku, kulturu i sport ZDK, Ministarstva za prostorno uređenje, promet i komunikacije i zaštitu okoline ZDK, Pedagoškog zavoda ZDK, JU Predškolski odgoj i obrazovanje, Instituta za zdravlje i sigurnost hrane ZDK, Aktiva direktora osnovnih škola ZDK, Aktiva direktora srednjih škola ZDK, autorice studije iz Kantona Sarajevo prof.dr. Sanela Klarić i prof.dr. Aida Kulo Ćesić, dr.spec. Elma Kuduzović iz JU Institut za zdravlje i sigurnost hrane Zenica, te predstavnici kompanije Mann+Hummel iz Tešnja i iz Njemačke.

12.11.2021 uživo gostovanje u emisiji Natura na radio BiH

13.11.2021 smo realizovana akcija sadnje urbanog zelenila (drveća i grmolikih sadnica) na tri lokacije u užem gradskom području. Akciji se odazvao veliki broj volontera i tom prilikom smo zasadili 54 nove sadnice. U akciji su pored članova Eko foruma učestvovali izviđači grada Zenice, direktor i učenici osnovne škole "Meša Selimović", učenici Prve gimnazije, Služba za ekologiju, komunalne poslove i mjesne zajednice grada Zenice, te komunalno preduzeće Alba Zenica.

15.10.2021 smo bili domaćini sastanka organizacija civilnog društva sa predstavnicima ŠPD ZDK, koje upravlja Parkom prirode Tajan, čime je otvoren dijalog sa institucijama nadležnim za brigu o područjima prirode u Zeničko-dobojskom kantonu. Ovo je nastavak saradnje udruženja uključenih u implementaciju projekata zaštite prirode s područja ZDK, koja je počela stvaranjem neformalne Koalicije za zaštitu prirode, u septembru na Martinskom visu. Sastanku su prisustvovali predstavnici UG Fojničani Maglaj, PD Vis Žepče, Snik Atom Zavidovići, Eko Tvrtkovic Zenica, Eko Turist Vareš, Udruženje inženjera i tehničara šumarstva Federacije Bosne i Hercegovine, Javnog preduzeća Šumsko–privredno društvo ZDK i Fond za zaštitu okoliša FBiH. U razgovorima su učestvovali i predstavnici WWF Adria i USAID, koji podržavaju inicijative nevladinog sektora na uspostavi novih zaštićenih područja. Održan je i online sastanak : NDI - Support to Civil Society in the Western Balkans

19.11.2021 smo ugostili 10 učenika osnovne škole Meša Selimović iz Zenice, inače jedna od Eko škola u projektu Misli o prirodi! i tom prilikom su članovi CPC tima organizovao radionicu "Eko putujuća slika", s ciljem razvijanja i oslobađanja kreativne energije kod mladih kroz slikanje.

20.11.2021 smo imali još jednu akciju sadnje drveća. Ovaj put je to bilo u sklopu regionalne akcije "Drvo prijateljstva" koja je dio šire kampanje "Ujedinjeni Balkan za čist zrak", realizuje se u koordinaciji Evropskog fonda za Balkan iz Beograda, uz podršku brojnih organizacija: Za čisto Sarajevo iz Sarajeva, Eko forum iz Zenice, Environmental Territorial Management Institute iz Tirane, Sbunker iz Prištine, Air Care iz Skoplja, OZON iz Podgorice, Regulatorni institut za obnovljivu energiju i životnu sredinu i Beogradska otvorena škola iz Beograda, te Pro.Tok21 iz Smedereva. Taj dan je zasađeno 50 sadnica na dvije lokacije u Zenici.

22-24.11.2021 učešće u svojstvu javnosti na glavnoj raspravi u parnici pred općinskim sudom Zenica – obeštećenje zbog zagađenja iz kompanije AMZ

26.11.2021 održan je sastanak u Federalnom ministarstvu okoliša i turizma. Sastanku je prisustvovala ministrica za okoliš i turizam FBiH Edita Đapo i njena saradnicima Suada Numić. Tema sastanka bila je procedura obnove okolinske dozvole za pogone i postrojenja kompanije ArcelorMittal Zenica. Na sastanku smo upoznali su ministricu s problemima koji su nastali kao posljedica neispunjavanja dijela obaveza iz važeće okolinske dozvole, kao što su nedovršeni projekat sekundarnog otprašivanja na BOF čeličani, problemi u radu hibridnih filtera na aglomeraciji, izostanak projekata na koksari, izbjegavanje pribavljanja okolinske dozvole za deponiju Rača, odvajanje Toplane od dozvole za ArcelorMittal (iako je taj pogon integralni dio proizvodnog procesa), te kašnjenje rješavanja otpadnih voda. Posebno se razgovaralo o studijama nultog stanja u okolini koksare, koje su bile propisane okolinskim dozvolama i 2010 i 2017. godine, ali nikad nisu urađene. Na sastanku je zaključeno da je neophodno organizovati još sastanaka s kompanijom ArcelorMittal kako bi im se dalo do znanja da neispunjavanje obaveza iz okolinske dozvole povlači za sobom kazne visine do 200.000 KM za svaki inspekcijski nadzor, kako je to predviđeno novim Zakonom o zaštiti okoliša, a koji je stupio na snagu u martu ove godine. Samo se visokim kaznama neodgovorni zagađivači mogu prisiliti da poštuju propise i ispunjavaju obaveze vezane za zaštitu okoliša, bez obzira na broj zaposlenih i ekonomski značaj za Federaciju BiH.

26-28.11.2021 učestvovali smo regionalnoj konferenciji zelenih stranaka Zapadnog Balkana u Šapcu (Srbija) u organizaciji National Democratic Institute iz SAD, Heinrich-Böll-Stiftung i European Greens.

29.11.2021 Odlazak u MZ Janjici u prostorije radi priprema za organizovanje javne tribine

30.11.2021 Prisustvovali smo promociji "Zelene agende za Zapadni Balkan" u organizaciji Pravnog instituta u Bosni i Hercegovini

Od decembra 2021 Eko forum učestvuje u zajedničkoj kampanji pod nazivom Ujedinjeni Balkan za čist zrak - Zajednička akcija upozoravanja građana o opasnostima zagađenog zraka na Zapadnom Balkanu. U ovoj kampanji učestvuju organizacije iz Srbije, Makedonije, Crne Gore, Kosovo, Albanija i Bosna i Hercegovina. Ova kampanja će trajati do maja 2022. godine.

1.12.2021 Ukupno 400 stabala zasađeno je u nekoliko gradova u regionu u okviru ovogodišnje regionalne inicijative „Drvo prijateljstva“ koju zajednički realizuju Evropski fond za Balkan (EFB) i njegovi lokalni partneri. Cilj ove inicijative je da pošalje snažnu zajedničku poruku da regionalna saradnja i solidarnost takođe mogu doprinijeti rješavanju tog pitanja i stvaranju uslova za čist zrak. „Drvo prijateljstva“ realizuju Evropski fond za Balkan i partnerske organizacije iz regiona: Za čisto Sarajevo iz Sarajeva, Eko Forum iz Zenice, Institut za teritorijalno upravljanje okolišem iz Tirane, Sbuker iz Prištine, Air Care iz Skoplja, OZON iz Podgorice, RERI i Beogradska otvorena škola iz Beograda i Pro.Tok21 iz Smedereva. Ova regionalna inicijativa bila je i najava za predstojeću regionalnu kampanju #BalkanUnitedForCleanAir. JU OŠ "Meša Selimović" Zenica i Eko HUB Zenica su ugostili predstavnice Švedske ambasade: savjetnicu za razvoj saradnje Evu Smedberg i programsku službenicu Aišu Bijedić. Posjeta je simbolično obilježena sadnjom drveta u dvorištu škole.

14.12.2021 u prostorijama mjesne zajednice Janjići smo zajedno sa Arhus centrom Sarajevo (Eko HUB Sarajevo) organizovali javnu tribinu "Linija (od)brane: Posljednji spas za rijeku Bosnu!". Javnoj tribini je prisustvovalo oko 60 građana, i to 11 aktivista, 2 predstavnika Agencije za vodno područje rijeke Save, 2 gradska vijećnika, 3 predstavnika političkih partija (SDP i Naša stranka), te 42 mještana MZ Janjići, Gorica, Putovići i Brist. Iako je bilo omogućeno i online prisustvo, tribinu su preko interneta pratila samo 3 učesnika. Na početku tribine prisutnima se obratio predsjednik mjesne zajednice Janjići Miralem Kaknjo. Jelena Ivanić, profesorica ekologije i zaštite životne sredine, aktivistkinja, potpredsjednica Centra za životnu sredinu Banja Luka, također je pozdravila skup te izrazila nadu da ćemo uspjeti sačuvati rijeku Bosnu. Robert Oroz, predsjednik Ekološko-humanitarne udruge „Gotuša“ iz Fojnice govorio je o njegovoj borbi za rijeku Željeznicu koju je trajala više od deset godina, te o važnosti očuvanja prirode u Bosni i Hercegovini. Ulrich Eichelmann, ekolog i konzervator koji se bavi očuvanjem i restauracijom rijeka, 2014 nagrađen Velikom nagradom za očuvanje prirode, zaštitom rijeka diljem Evrope bavi se više od 20 godina. Ulrich je izvršni direktor organizacije RiverWatch, koordinator kampanje "Plavo srce Europe" i producent filma "Climate Crimes". Prisutnima je prezentirao negativne posljedice hidroelektrana i negativna iskustva iz Austrije, u kojoj postoji skoro 5000 hidroelektrana i nema slobodnih rijeka kao što je rijeka Bosna. Pippa Gallop, aktivistica organizacije BankWatch CEE, putem video linka prezentirala je borbu za rijeke na Zapadnom Balkanu kroz monitoring i zagovaranje kod finansijskih institucija i banaka koje bi trebale kreditirati samo one projekte koji nemaju negativan uticaj na okolinu. Emina Veljović, MA Javne uprave i međunarodnih odnosa, usmjerenje "okolišne politike", dipl. pravnica, izvršna direktorica Udruženja "Resursni Aarhus centar u BiH",

prezentirala je pravne aspekte zaštite rijeke Bosne. Dr.Sc. Samir Lemeš, predsjednik upravnog odbora Eko Foruma Zenica i ekološki aktivista prezentirao je retrospektivu borbe protiv HE Janjići.

22.12.2021 objavom na našoj web i FB stranici smo podsjetili javnost da je prošlo devet godina od protesta koje je Eko forum organizovao. Bez obzira na neuspjehe i samo dio ostvarenih rezultata, nastavljamo sve oblike borbe dok ne postignemo krajnji cilj: ekološki održivu Zenicu.

22.12.2021 predstavnici Eko foruma, Saveza izviđača grada Zenice i Eko-Tvrtkovca, održali su sastanak s ministrom za prostorno uređenje, promet, komunikacije i zaštitu okoline u Vladi Zeničko-dobojskog kantona, Arnelom Isakom i njegovim saradnicima. Razgovaralo se o aktuelnim projektima organizacija civilnog društva i ulozi ovog ministarstva u rješavanju pitanja zaštite okoliša u Zenici i Zeničko-dobojskom kantonu. Ministar Isak izrazio je spremnost da podrži inicijative nevladinih organizacija u oblastima zaštite okoliša i očuvanja biodiverziteta na području Zeničko-dobojskog kantona. Predstavnici ovih udruženja upoznali su ministra Isaka sa rezultatima aktuelne kampanje zagovaranja proglašenja zaštićenog područja koje je prostorno-planskom dokumentacijom označeno kao "Babina-Tvrtkovac" na teritoriji grada Zenice. Na sastanku je bilo riječi i o industrijskom otpadu, koji nije obuhvaćen Kantonalnim planom upravljanja otpadom ZDK iz 2009. godine. Ukazano je na potrebu da se ovaj plan hitno ažurira, odnosno da se realizuje zaključak Skupštine kantona iz marta 2017. godine.

27.12.2021 Jedan od osnivača Eko foruma, mr.sc. Fahrudin Duran, preminuo je 25.12.2021 u 81. godini života. Jedan od najvećih ekesperata za kvalitet zraka u u Bosni i Hercegovini, nesebično je dijelio svoje znanje sa svima koji su to željeli. Aktivisti Eko foruma su od njega jako puno naučili o tome kako se mjeri zagađenost zraka, kakve treba da izgledaju okolinske dozvole, koji su to industrijski izvori zagađenja zraka i koje tehnologije se mogu koristiti da se zagađenje smanji.

7.1.2022 obaviješteni smo od strane Federalnog ministarstva okoliša i turizma da su naša dugogodišnja insistiranja da se u koksare izvrše mjerenja. Nakon velikog broja sastanaka, pritisaka i zagovaranja, kompanija ArcelorMittal konačno je pristala da provede mjerenja osnovnih i specifičnih parametara u okruženju koksare, te je 17.12.2021 Federalno ministarstvo okoliša i turizma dalo saglasnost da se ta mjera provede u januaru 2022. godine. U okolinskoj dozvoli za pogon Koksara kompanije ArcelorMittal koja je izdata 24.11.2010 bila je planirana mjera izrade analize o zagađenosti okoliša u nultom stanju – mjerenja emisije i imisije, a koja se trebala provesti do novembra 2011. godine. U "integralnoj" okolinskoj dozvoli za pogone i postrojenja ArcelorMittal Zenica koja je izdata 3.4.2017. godine, kod opisa realiziranih mjera, za tu mjeru navedeno je da mjeru "nije moguće realizovati". U istoj "integralnoj" dozvoli naložena je nova mjera – da se izradi analiza zagađenosti okoliša u okruženju Koksare. Mjera je trebala početi s realizacijom u augustu 2018. godine. U Zahtjevu za izdavanje obnovljene okolinske dozvole za pogone i postrojenja ArcelorMittal Zenica koji je podnesen u februaru 2021 navedeno je da se ta mjera neće realizovati.

7.1.2022 S novom 2022. godinom, uvodi se obaveza redovnog odvoza otpada sa izletišta Smetovi. Eko forum je, u okviru Projekta "Zaštita prirode na teritoriji grada Zenice", nabavio četiri zvonasta kontejnera, zapremine 2,5 hiljade litara, koja su trenutno postavljena pored parkinga na Smetovima. Sa dolaskom toplijih dana, kontejneri će dobiti i svoj konačni raspored, kako bi bili lako dostupni korisnicima. Nabavljena su ukupno četiri kontejnera, dva za miješani komunalni otpad i dva za prikupljanje posebnih kategorija otpada: PET i papir.

10.1.2022. u sali gradskog vijeća Zenica održali smo javnu raspravu o okolinskoj dozvoli za ArcelorMittal Zenica. Federalno ministarstvo okoliša i turizma stavilo je na uvid Dopunjeni zahtjev privrednog društva ArcelorMittal d.o.o. Zenica za ponovno izdavanje okolišne dozvole. Tekst dopunjenog zahtjeva bio je dostupan je na web stranici Ministarstva. Primjedbe na dopunjeni Zahtjev za izdavanje okolišne dozvole mogle su se dostaviti Ministarstvu u pisanoj formi u roku od 30 dana od dana javnog objavljivanja, odnosno do 14.1.2022. godine. Kako se radi o pogonima i postrojenjima koja imaju značajan utjecaj na okoliš u Zenici, pozivali smo javnost da učestvuje u ovoj javnoj raspravi, kako bi se otklonile sve nedoumice, dali odgovori na otvorena pitanja i kako bi nova okolinska dozvola osigurala dosljedno provođenje okolišnih propisa FBiH uz kontinuitet metalurške proizvodnje. Javnoj raspravi je prisustvovalo 46 osoba: predstavnici gradske uprave Zenica, vijećnici, predsjednici mjesnih zajednica, nevladinih organizacija i građana.

25.1.2022. U postupku obnove okolinske dozvole za pogone i postrojenja kompanije ArcelorMittal Zenica organizovana je posjeta pogonima. Time je ispunjen još jedan od zahtjeva Eko foruma u ovom postupku. Kompanija je omogućila članovima stručnog tima koji je imenovalo Federalno ministarstvo okoliša i turizma, kao i predstavnicima Eko foruma, da izvrše direktni uvid u dokumentaciju, rezultate i efekte do sada realiziranih mjera iz prethodnih okolinskih dozvola. Iako su se neki od članova stručnog tima protivili obilasku pogona, smatrajući da je dovoljan uvid u dokumentaciju, izvršen je obilazak pogona nove Toplane, koksare, konvertorske čeličane, biohemije i aglomeracije. Pogoni visoke peći i valjaonica nisu obuhvaćeni ovom posjetom jer su to pogoni koji imaju manji uticaj na okoliš zbog prirode rada ili znatno ranije realizovanih projekata. Uvidom u stanje na terenu, moglo se vidjeti da su neki od problema zaista riješeni, te da su smanjene emisije u zrak. Skruber za odsumporavanje otpadnih plinova na novoj toplani još uvijek nije u funkciji, i emisije još uvijek nisu ispod dozvoljenih normi. Sekundarno otprašivanje na pogonu BOF čeličane je konačno završeno i već nekoliko mjeseci su emisije prašine iz ovog postrojenja značajno smanjene. Nismo dobili dozvolu za fotografisanje pogona, ali mogli smo se lično uvjeriti da je stepen zahvata dimnih plinova na čeličani znatno bolji i nekontrolisane emisije manje nego ranije. Na aglomeraciji je u funkciji samo jedan od dva hibridna filtera. Drugi radi samo djelimično, jer već godinu dana kasni isporuka novih elektroda. Dobra vijest je da se sinter mašina 4, koja nije spojena na filtere, više ne koristi, čime su i emisije iz aglomeracije značajno smanjene. Ostaje problem odlaganja otpada, ali kompanija tvrdi da se troska više neće odlagati na Raču jer su pronašli kupce i postojeće planine troske u krugu kompanije bi navodno trebale

biti uklonjene u narednom periodu. Jedini problem za koji još uvijek nema adekvatnog rješenja su emisije s koksare. Izvršena je rekonstrukcija 4 koksne peći, od ukupno 64, čime su smanjene fugitivne emisije koje iz ovog pogona izlaze nekontrolisano. Planirana je rekonstrukcija još 40 peći tokom narednih 5 godina, ali još nema ponuđenog tehničkog rješenja koje bi eliminisalo emisije prašine i kancerogenih gasova iz ovih postrojenja. Treba napomenuti da tehnička rješenja postoje i već su implementirana u Njemačkoj, Poljskoj, Kini, Japanu, SAD i drugim zemljama.

28.1.2022 smo informisani da Njemačka banka KfW započela je postupak raskidanja sporazuma o dodjeli kredita u iznosu od 30 miliona eura za izgradnju hidroelektrane Janjići na rijeci Bosni. Mjesna zajednica Janjići, Eko forum Zenica i Arhus centar Sarajevo pokrenuli su u januaru 2021 postupak pred uredom za žalbe ove banke. KfW banke nam je poslala informaciju da je pokrenut postupak raskida sporazuma o dodjeli kredita. Bez ovih kreditnih sredstava, JP Elektroprivreda najvjerovatnije neće moći izgraditi hidroelektranu Janjići, čime smo dobili jednu bitku za spas rijeke Bosne, Janjićke ade i slapova. Naša borba se nastavlja dalje, kampanjom za brisanje ovog energetskog objekta iz prostornog plana.

17.2.2022 u prostorijama Instituta "Kemal Kapetanović" organizovali smo zajedno sa Eko HUB Maglaj Okrugli sto o Centru za okoliš ZDK. U radu okruglog stola učestvovali su predstavnici Univerziteta u Zenici, resornih ministarstava ZDK, Federalnog hidroemeteorološkog zavoda, Misije OSCE u BiH, Centra za promociju civilnog društva i Švedske ambasade u BiH. Cilj okruglog stola bio je da na jednom mjestu okupi sve aktere koji mogu pomoći da se Centar za okoliš ZDK stavi u punu funkciju, devet godina nakon usvajanja kantonalnog zakona kojim je Centar i uspostavljen. Iako je u Centar za okoliš do sada uloženo nekoliko miliona KM, kroz nabavku mjerne i kalibracijske opreme, i opremanje prostora, još uvijek ne može vršiti sve zakonom predviđene funkcije jer nedostaje stručnih kadrova. Na konkursu raspisanom 2021 nijedan kandidat nije zadovoljio tražene uslove. Ambasadorica Švedske u Bosni i Hercegovini Johanna Strömquist istakla je kako je Švedska najveći donator u BiH u oblasti zaštite okoliša i kako će i dalje podržavati, kako razvoj civilnog društva, tako i jačanje kapaciteta institucija u BiH, da bi se postiglo ono što je Švedska uspjela ostvariti zahvaljujući činjenici da civilno društvo u Švedskoj postavilo pitanje zaštite okoliša visoko u zvaničnim politikama. Ministar obrazovanja, nauke, kulture i sporta ZDK, Spahija Kozlić, nakon predstavljanja tekućih i realizovanih projekata na utopljanju škola i zamjeni kotlovnica, iznio je opredjeljenje Vlade ZDK da se učini sve kako bi se ovaj Centar u potpunosti osposobio. Ove godine je plan javnih nabavki za namjenska sredstva za zaštitu okoliša u iznosu od oko 500.000 KM usvojen znatno ranije nego prethodnih godina, što bi moglo pomoći da se ne ponavljaju problemi koji su se javljali ranije – kasno usvajanje budžeta, plana nabavki, tenderi i nabavka opreme. Nakon prezentacija i diskusije, učesnici okruglog stola donijeli su niz zaključaka.

22.2.2022. U sjedištu Vlade ZDK održan je sastanak ekoloških udruženja s premijerom Vlade ZDK i Ministrom za prostorno uređenje, promet, komunikacije i zaštitu okoline ZDK. Tema sastanka bilo je formiranje novih zaštićenih područja na teritoriji kantona i traženje rješenja za održivo upravljanje tim područjima. Premijer i ministar iskazali su ozbiljnu želju i zainteresovanost da se provede procedura zaštite prema zakonu o zaštiti prirode. Ekološka udruženja zagovaraju formiranje posebne kantonalne javne ustanove za upravljanje zaštićenim područjima.

26.2.2022 U Vitezu je održana prva u nizu radionica u okviru projekta "Podrška civilnom društvu u borbi protiv korupcije" koji realizuje Nacionalni Demokratski Institut (NDI). U projektu pored Eko foruma Zenica učestvuje još šest organizacija civilnog društva u dvije tematske oblasti: zaštita okoliša i zdravstvo.

28.2.2022. učestvovali smo u događaju pod nazivom "Pričajmo o zraku" u organizaciji Švedske ambasade. Prisutni su bili predstavnici civilnog društva, institucija vlasti i stranih organizacija, kako bi razgovarali o zraku i tražili rješenja za čišći zrak u Bosni i Hercegovini.

3.3.2022 Održan je sastanak sa predstavnicima Agencije za vodno područje rijeke Save u Sarajevu. Teme sastanka bile su vodne dozvole za pogone ArcelorMittal Zenica i za planirane hidroelektrane na rijeci Bosni, uspostavljanje referentne laboratorije, te nerealni izvještaji certificiranih laboratorija koje mjere otpadne vode.

10.3.2022 Skupština Zeničko-dobojskog kantona usvojila je akcione planove za zaštitu okoliša: 2017 Kantonalni ekološki akcioni plan (KEAP) a 2020 Akcioni plan zaštite kvaliteta zraka za područje Zeničko-dobojskog kantona. U decembru 2021 Vlada ZDK imenovala je radna tijela za praćenje realizacije tih planskih dokumenata u kojima je po prvi put uključeno i civilno društvo. Održan je prvi radni sastanak radnog tijela za praćenje realizacije Akcionog plana zaštite kvaliteta zraka. Plan predviđa 40 mjera, koje bi se realizovale do 2030. godine. Za realizaciju 9 mjera je potrebno obezbijediti 3 miliona KM, 8 mjera ne iziskuju nikakve troškove, a 23 mjere će se raditi "prema posebnim predračunima". Radna grupa je na sastanku usvojila niz zaključaka kojim se, između ostalog, od nadležnog ministarstva i Centra za okoliš ZDK na institutu "Kemal Kapetanović" traži da obezbijede informacije o realizaciji planiranih mjera, pripreme izvještaj o stanju kvaliteta zraka u ZDK za 2020. i 2021 godinu, inoviraju Plan interventnih mjera u slučajevima prekomjerne zagađenosti zraka na području ZDK iz 2013. godine, te da se pošalju urgencije nadležnim institucijama koje su bile zadužene za realizaciju aktivnosti iz plana. Za početak aprila zakazan je sastanak i druge radne grupe koja će pratiti realizaciju KEAP-a. Time se konačno počinju realizovati preporuke koje je Eko forum uputio institucijama ZDK u decembru 2020. godine.

Projekti

U izvještajnom periodu udruženje je realiziralo 4 projekta:

1. Zaštita prirode na teritoriji grada Zenice

Projekat se finansira iz granta za zagovaračke mreže u okviru projekta “Misli o prirodi!” koji implementira Centar za promociju civilnog društva, a finansira Vlada Švedske, te iz granta Ministarstva za prostorno uređenje, promet i komunikacije i zaštitu okoliša ZDK (sredstva po Javnom pozivu za realizaciju programa, projekata i srodnih aktivnosti iz oblasti zaštite okoliša za 2021 godinu). Partneri na projektu su Centar za promociju civilnog društva, Ekološko udruženje “EKO Tvrtkovac” Zenica, Savez izviđača Grada Zenica. Opšti cilj projekta je najmanje 10% površine područja Grada Zenice zaštićeno u skladu sa Zakonom o zaštiti prirode FBiH. Specifični ciljevi su: Stvoreni preduslovi za proglašenje minimalno jednog zaštićenog područja na teritoriji grada Zenice, Javnost upoznata s potrebom i mogućnostima proglašenja zaštićenog područja prirode na teritoriji grada Zenice, te Uspostavljen konstruktivni dijalog na relaciji kanton-grad-OCD o temama zaštite prirode.

2. Ujedinjeni Balkan za čist zrak

Kampanja “Ujedinjeni Balkan za čist zrak” ima samo jedan cilj, da informiše stanovnike Zapadnog Balkana o uzrocima, posljedicama i mogućim rješenjima za poboljšanje kvaliteta zraka. Informisani čovjek dovoljno je motivisan i spreman na zajedničku i solidarnu borbu za čist zrak u svojoj ulici, kvartu, selu i gradu Zapadnog Balkana. Partneri na projektu su Evropski fond za Balkan i partnerske organizacije iz regiona: Za čisto Sarajevo iz Sarajeva, Eko Forum iz Zenice, Institut za teritorijalno upravljanje okolišem iz Tirane, Sbunker iz Prištine, Air Care iz Skoplja, OZON iz Podgorice, RERI i Beogradska otvorena škola iz Beograda i Pro.Tok21 iz Smedereva.

3. Koalicija 27

Grant u okviru projekta “Zaštićena područja za prirodu i ljude II 2019 – 2022”, Podrška radu postojećih nacionalnih mreža/saveza Organizacija civilnog društva, OCD (Koalicije 27 u BiH i SRB). Partner na projektu je Udruga Dinarica Mostar. Opšti cilj projekta je Očuvanje biološke raznolikosti na Zapadnom Balkanu i osiguravanje dobrobiti svih sadašnjih i budućih generacija.

4. Eko hub Zenica

Grant za Eko Hubove u okviru projekta “Misli o prirodi!” koji implementira Centar za promociju civilnog društva, a finansira Vlada Švedske. Opšti cilj projekta je Uspostaviti i održavati funkcionalnu lokalnu mrežu partnera koja djeluje na zaštiti okoliša. Specifični ciljevi su: 1. Uspostaviti i formalizirati saradnju s drugim organizacijama civilnog društva na području ZDK koje se bave zaštitom okoliša, 2. Osposobiti i osnažiti OCD u ZDK da trajno djeluju na zaštiti okoliša, 3.

Pružiti podršku školama u procesu unapređenja svog rada u oblasti zaštite okoliša, 4. Učiniti dostupnima informacije o nadležnostima i ovlaštenjima svih institucija odgovornih za zaštitu okoliša za OCD, medije, nastavnice, učenike i generalnu javnost u ZDK, 5. Povećati odgovornost institucija za zaštitu okoliša i kompanija koje djeluju na području ZDK

Publikacije

U izvještajnom periodu objavljene su sljedeće publikacije:

- **Elaborat o opravdanosti proglašenja zaštićenog područja Babina-Tvrtkovac**
Elaborat sadrži osnovne informacije o periodu istraživanja, karakteristikama topografije, geologije, hidrologije, klime, flore, faune, prirodnih staništa, posebno vrijednih vrsta, prirodnog i kulturnog naslijeđa, prijedlog stepena zaštićenosti područja, razloge izrade elaborata, opis pristupa i metodologije za izradu elaborata i druge bitne informacije. Elaborat je pripremljen kao zagovaračka mreža u okviru projekta Misli o prirodi! koji realizira Centar za promociju civilnog društva uz finansijsku pomoć Švedske.
- **Priručnik o upravljanju zaštićenim područjima u BiH**
Ovaj priručnik nastao je kao jedan od rezultata projekta "Zaštita prirode na teritoriji grada Zenice" za koji je Eko forum Zenica dobio grant za zagovaračke mreže u okviru projekta "Misli o prirodi!" koji implementira Centar za promociju civilnog društva, a finansira Švedska. Opšti cilj projekta je da najmanje 10% površine područja Grada Zenice bude zaštićeno u skladu sa Zakonom o zaštiti prirode FBiH. Partneri na projektu su Eko forum Zenica, Udruženje Eko Tvrtkovac i Savez izviđača Grada Zenice.
- **Šume i gradsko zelenilo**
Ovaj priručnik nastao je kao jedan od rezultata projekta "Eko HUB Zenica" za koji je Eko forum Zenica dobio grant za Eko Hubove u okviru projekta "Misli o prirodi!" koji implementira Centar za promociju civilnog društva, a finansira Švedska. Opšti cilj projekta je da se uspostavi i održava funkcionalna lokalna mreža partnera koja djeluje na zaštiti okoliša.
- **Top lista deset najvećih zagađivača za 2018**
Top lista deset najvećih zagađivača, prema podacima iz integrisanog registra ispuštanja i prenosa zagađenja (PRTR) Bosne i Hercegovine – izvještaji za 2018. godinu. Baza podataka je zasnovana na zvaničnim podacima koje su industrijski pogoni dostavili nadležnim organima vlasti. Za tačnost podataka odgovorni su operateri industrijskih postrojenja.

U Zenici, 14.03.2022.g.

predsjednik udruženja Eko forum Zenica
Zlatan Alibegović